

1. Si sint publica.
2. Si non sint publica, sed tantum inserviant determinatis personis, e. g. infirmis in Nosocomio, vel Monialibus, aut aliis in Monasterio sive Conventu commorantibus?

Et S. eadem C. . . . respondendum censuit:

Ad quaest. 1. et 2. „Juxta Decretum die 12. Nov. 1831“.

Atque ita rescripsit ac servari mandavit. n. 4985 die 7. Dec. 1844.

Ad *dubium*: An festum Titularis Capellarum publicarum et Oratoriorum, quae existunt in aedibus episcopalibus, Seminariis, Hospitalibus, domibus Regularium et privatis, celebrari debeat sub ritu dupl. 1. cl. cum *Credo et Octava*? Nam Oratoria publica vocantur etiam Ecclesiae. S. C. resp.: Negative. n. 4669 ad 34 die 12. Nov. 1831.

18) In Missa Titularis Cathedralis.

Ad *dubium*: An in die s. Laurentii Titularis Cathedralis Perusii sit recitandum Symbolum in Ecclesiis Regularium? S. C. resp.: Negative, nisi in Ecclesia propria. n. 3804. ad 1 die 23. Mart. 1709.

19) In Missa Titularis Ordinis

Ad *dubium*: An sit servanda consuetudo penes nonnullos Regularium Ordines invecata addendi Symbolum Nicaenum Missae insignium Patronorum Ordinis, qui non sint Institutores, Titulares, vel Patroni, etiam si de ipsis recitetur ritu dupl. II. Cl.? Emi. et Rmi. P. respondendum censuerunt:

„Consuetudinem esse abrogandam, et solum addendum Symbolum, si sint vel Titulares vel Patroni“.

Atque ita servandum mandarunt. n. 5125 ad 3 die 22. Julii 1848.

Ad *dubium*: An Festa principalia

Ordinum Religiosorum, in quibus juxta Rubricas inter Regulares Familias addi potest in Missa Symbolum Nicaenum, intelligenda veniant Festa Fundatorum tantum, vel potius etiam aliorum Sanctorum cujusque Ordinis, quae recensentur sub ritu dupl. II. Cl. cum Octava?

Et S. eadem C. . . . rescribendum censuit:

„Affirmative ad primam partem, Negative ad secundam“.

Atque ita rescripsit die 12. Martii 1836. n. 4772 ad 3.

20) In Missa translati Patroni.

Festum Patrocinii S. Joseph primi regionis Canadae Patroni per Indultum die 16. Nov. 1834 datum, concessum fuit Archidioecesi Quebecen. sub ritu dupl. II. cl. Dom. II. p. Pascha celebrandum, sed per tenorem provisionis S. C. die 20. Novb. ejusdem Anni datae, quando illud Festum venerit die XXV. Apr., vel I. aut III. Maj. transfertur. Quaeritur: an *Credo* recitandum sit in Missa Festi sic translato ratione Dignitatis Patroni Dioecesis et Regionis?

Et S. eadem C. . . . rescribendum censuit.

„Quando legitime constet de Patronatu elevari permittitur Festum Patrocinii S. Joseph ad duplex I. cl.“

Atque ita rescripsit ac servari praecepit eadem in Archidioecesi. n. 4904 ad 2 die 12. Sept. 1840.

Cum ex Indulto diei 16. Nov. 1834 concessum fuerit Festum Patrocinii S. Joseph celebrandum sub ritu dupl. II. Cl., utpote primi Canadensis Regionis et Dioecesis Patroni, quaeritur: utrum recitandum sit Symbolum in Missa, quoties ad aliam diem conferre contigerit?

Et S. eadem C. . . . rescribendum censuit:

„Affirmative, si vere constat de Patronatu formiter ab hac S. S. confirmato“.

Atque ita rescripsit, ac servari mandavit. n. 4988 ad 1 die 7. Decemb. 1844.

21) In Missa Translationis Patroni Cathedralis.

Ad *dubium*: Utrum in festo Translationis Patroni princip. Cathedralis sub ritu dupl. maj. in missa dici possit Symbolum, non solum in Cathedr. sed etiam per totam Dioecesim. S. C. resp.: Negative. n. 3565 ad 7 die 19. Junii 1700.

22) In Missa votiva B. V. Mariae.

Vd.: *Missa vot. B. V. M.*

23) In Missa vot. de Sancto.

Vd.: *Missa vot. de Sancto.*

24) In M. vot. pro re gravi.

Vd.: *Missa vot. pro re gravi.*

25) In Miss. vot. sol. infra octavas.

Vd.: *Missa vot. priv. (dies; decr. n. 4183).*

26) Si Sacerd. celeb. in aliena Ecclesia.

Vd.: *Missa in aliena Eccles. (decr. n. 48.8); Credo in missa propt. reliqu. insig. (decr. n. 3073).*

27) In Officio.

Vd.: *Officium.*

Quando ad *Credo* detegitur caput?

Vd.: *Caput (quando deteg.)*

28) In Vigiliis Nativit. Dom.

Vd.: *Credo in dominica (decr. n. 4523).*

De *Credo* cf.: *Gloria, Novena; Symbolum.*

Decreta authentica.

CRUCES.

1) Duodecim in Consecrat. Eccles.

Vd.: *Dedicatio Eccles. (cruces); Candelae (in Dedic. Eccles. ad parietem).*

2) Quinque in Consecr. Altaris.

Vd.: *Consecratio altarium plur. (modus, decr. n. 4565 ad 3).*

3) Simultaneae deferendae in process.

Ad *dubium*: An in Processionibus, in quibus intersunt tam Parochus et Beneficiati S. Michaelis Archangeli, quam Archipresbyter et Canonici Ecclesiae S. Mariae Matricis, praecedere simultaneae debeant duae Cruces utriusque Ecclesiae, et post eas simultaneae etiam utriusque Capitulares? Et quatenus negative: An Parochus et Beneficiati S. Michaelis Archangeli incedere priores debeant post propriam Crucem, quatenus incedere nolint post unicam Crucem Matricis ipsius, ita ut hujus Archipresbyter et Canonici velut digniores incedant postremi in casu etc.? S. C. respondit: „Servetur solitum juxta modum, dummodo Cruces procedant una post aliam, pariterque Capitula“.

N. 4483 ad 1 die 11. Septembris 1802.

Vd.: *Cruciferar. archiep. (habitus, decr. n. 4672).*

CRUCIFERARIUS.

1) Archiepiscopi.

(*Habitus*).

Vd.: *Subdiaconus; Cotta; Cruciferarius in proces. dom. Palmar. etc.*

Cruciferum, dum Archiepiscopus concionibus interest, posse crucem parieti haerentem dimittere. n. 2029 ad 3 die 24. Jan. 1660.

Ad *dubium*: Celebrante in Ponti-

ficalibus Archiepiscopo (Pisano), ipsius Crux defertur sine luminaribus a Crucifero absque Tunicella, et habitu Choralis tantum induto: Crux vero, quae ante Clerum procedit, defertur ab Acolyto juxta morem Ecclesiae, Pluviali induto inter duos Ceroferarios candelabra accensa portantes similiter paratos. S. C. resp.:

„Servandum esse dispositionem Caeremonialis lib. 2 cap. 6 §. 24 et 27 eo modo ut Subdiaconus deferens Archiepiscopalem Crucem sit paratus; atque Acolytus deferens Crucem Capituli sit Cotta indutus, medius tamen inter duos Ceroferarios cum luminaribus.“ n. 4672 ad 16 die 12. Nov. 1831.

2) Cleri.

a) Cotta indutus.

Cf.: *Processio SSmi. Regul.* (modus); *Cruciferarius archiep.*

Crucem Cleri saecularis omnino deferendam esse a Clerico cotta induto et contrariam consuetudinem esse abusum. n. 2067 die 12. Junii 1660. Vd.: *Cotta.*

6) Paratus in processione.

Crux processionalis in processione in Dominica infra octav. SS. Corp. Chr. Nuceriae potest deferri ante Clerum (paratum) per Subdiaconum paratum cum tunicella. n. 4113 ad 2 die 20. Maji 1741.

Vd.: *Instructio Clem.* §. XX. n. 1. 16.

3) In process. dom. Palmar., die Ann. fid. def., die festo Purif. B. V. M.; Coena Dom. et Parasceve.

Vd.: *Planeta plicata* (pro Dalmatica etc. decr. n. 4620.); *Subdiaconus Episcopi.*

Asservari potest consuetudo (Cathedr. Conimbricen.) ut in *procesioni-*

bus Palmarum et Candel. (functionem non peragente Episcopo) Crucem portet Capellanus per turnum paratus. n. 4233 ad 10 die 14. Apr. 1753.

Ad dubium: Quomodo sit interpretandum Caerem. Ep. quoad crucis delationem in processionibus ac potissimum die omnium fid. def., Purificat. et dominica Palmarum, assistente nimirum Episcopo? S. C. resp: Caeremoniale Epis. interpretatione non indiget et sub respectivis capitibus aperte declarat, a quo et qua s. veste induto deferenda sit crux, nimirum: in die Purificat., Dom. Palm., Fer. V. in Coena Dom., Fer. VI. in Parasc., a Subdiacono diverso a Ministrante, amicto Tunicella aut planeta plicata, prout exigit s. actionis qualitas; die vero Commemorat. Omn. Fid. def. a Subdiacono missae. n. 4620 ad 1 die 6. Maji 1826.

NOTA GARDELLINI AD HOC DECRETUM:

Non inficior aliqua (sed sane pauca) in Episcoporum Caeremoniali occurrere, quae forte non satis clara videri possunt; talia tamen non sunt, dummodo non superficiali intuitu, vel sola, separatim a contextu, spectetur expressio, vel ratio haberi velit omissionis alicujus dictionis non necessario exprimendae, ut sibi fingunt, qui novitates amant, easque inducere student; sed attenda sunt, simulque conferenda adjuncta, et circumstantiae sacrae functionis, ut qui fuerit extensoris sensus, et quid in casu faciendum sit, intelligatur. In hoc tamen immorari non est opus, quum in proposito casu, de quo est quaestio, nihil implexum sit, nil obscurum, nil non satis declaratum, ut propterea interpretatio sit postulanda. Lege *cap. 16. lib. 2. Caeremonialis* de Processione Candelarum in die Purificationis B. M. V., praesente Episcopo. Ibi *num. 15.* prae-

cipitur. Processionem esse inchoandam, praeunte thuriferario, quem sequuntur *duo Acolythi . . . et inter eos Subdiaconus paratus Planeta ante pectus plicata super Albam sine manipulo, portans Crucem.* Igitur non a Clerico Cotta induto Crux est deferenda, sed ex Caeremonialis lege a *Subdiacono Planeta ante pectus plicata.* Quod vero is diversus esse debeat a Subdiacono Missae ministrante, clarissime patet, quia, dum fit Processio, *Canonicus, aut alius Missam celebraturus cum Diacono et Subdiacono capiunt paramenta convenientia.* Ibi §. 16. Nec diversus est ordo servandus in Dominica Palmarum, etenim, ut in cap. 21. §. 8 habetur, *ordinatur per Caeremoniarium Processio per Ecclesiam eodem ordine, quo ibi (scilicet in die Purificationis) dictum fuit . . . interim Canonicus Missam celebraturus cum Diacono et Subdiacono debent esse parati.* Quod vero attinet ad *Feriam V. in Coena Domini,* jubet Caeremoniale cap. 23. num. 10. *interim alter Subdiaconus accipit Crucem velatam velo violaceo.* Et agens *cap. 25. de Feria VI. in Parasceve: interim ordinatur Processio . . . praecedat Subdiaconus paratus cum Cruce denudata inter duos Ceroferarios.* Qui Subdiaconus alius sit oportet a Subdiacono Missae, qui ministrare necessario debet Celebranti in reliquo Officio et Missa, quae dicitur *Praesantificatorum.* Ubinam igitur obscurum occurrit quod interpretatione indigeat? imo potius clara sunt omnia et ad cujuscumque intelligentiam expressa.

Aliqua forte posset exoriri dubietas de Crucifero adhibendo apud Castrum doloris, dum assistens Episcopus vel e throno vel e faldistorio in die omnium Fidelium defunctorum, et in Anniversariis absolutionem facit. Siquidem Caeremoniale *lib. 2 cap. 12 n.*

6. apertis non id declarat verbis: at si te non pigeat implicitum scrutari sensum, fatearis oportet, satis hoc esse declaratum. En Caeremonialis verba: *Si Episcopus voluerit ipse absolvere, deposita cappa apud sedem, capiet amictum supra Rochettum, sive supra cottam, si sit Regularis, crucem peccatoralem et Stolum, et demum pluviale nigrum, et mitram simplicem, et omnia fient, quae superius in praecedenti capite dicta sunt.* Atqui ibi legitur: *praecedunt duo Acolythi . . . in quorum medio erit Subdiaconus, qui in Missa cantavit Epistolam, deferens Crucem etc. cap. 11 num. 14.* Idipsum igitur faciendum est si Episcopus dumtaxat assistat, et Missa ab alio celebrata fuerit. Atque haec est omnium Ecclesiarum Cathedralium praxis, quae arbitrarie invertenda non est, imo constanter servanda, cum nulla ratio occurrat, qua vel Subdiaconus diversus a Ministrante, vel non Tunicella nigri coloris, sed simplici indutus Cotta, Crucem deferat.

CRUX.

1) In Absolutione ad feretrum.

Vd.: *Absolutio. Cruciferarius in processione Dom. Palmar.* (decr. n. 4620).

2) Altaris.

Cf.: *Benedictio Crucis.*

Parva Crux cum imagine Crucifixi, posita super tabernaculum ligneum, in quo inclusum asservatur SS. mun. in altari, non est sufficiens ad implementum rubricae volentis, quod in altari, dum celebratur missa, debeat apponi crux in medio candelaborum, sed poni debet alia crux. n. 2231 ad 1 die 16. Junii 1663.

In altari, in quo est magna statua SS. Crucifixi, illa est sufficiens et non indiget alia cruce. *Ibid.* ad 2. Res